

**Pemuda Umno Semporna Bidas Kenyataan Presiden SAPP Berhubung Penculikan  
Bernama  
7 Apr, 2014**

KOTA KINABALU, 7 April (Bernama) -- Pemuda Umno Semporna membidas kenyataan Presiden Parti Progresif Sabah (SAPP) Datuk Yong Teck Lee yang mengaitkan insiden penculikan dua wanita asing di Sabah dengan dakwaan kecuaiian Anggota Parlimen Semporna Datuk Mohd Shafie Apdal.

Ketuanya Mohd Azis Jamman berkata kenyataan Yong hanya menunjukkan beliau sanggup mempolitikkan aspek keselamatan negara dan meniup api kemarahan rakyat tempatan.

"Datuk Seri Mohd Shafie yang juga Menteri Kemajuan Luar Bandar dan Wilayah tidak menganggotai Jawatankuasa Keselamatan Negeri mahupun Kawasan Keselamatan Khas Pantai Timur Sabah (ESSCom).

"Namun beliau sering menasihatkan pihak berkuasa keselamatan terutama pihak tentera dan polis agar sentiasa memantau dan meningkatkan tahap keselamatan," katanya dalam satu kenyataan.

Mohd Azis mengulas kenyataan Yong di sebuah portal berita pada 5 April lepas yang mengaitkan Mohd Shafie dengan insiden penculikan itu dan menyarankan agar gaji menteri itu dikurangkan.

Rabu lalu seorang warga China Goa Hua Yuan, 29, dari Shanghai dan pekerja resot dari Filipina, Marcy Dayawan @ Mimi, 40, diculik tujuh lelaki bersenjata kira-kira 10.30 malam daripada Singamata Adventures and Reef Resort di Semporna.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1028638>